

淨土五經



淨土五經



书 名：淨 土 五 經

出 版 / 天台山国清讲寺法物流通处

书 号：浙民宗(96)第18号

地 址 / 浙江省天台县国清讲寺法物流通处

电 话 / (0576) 3882117

传 真 / (0576) 3898010

邮 编 / 317200

开 户 / 天台县工商银行

帐 号 / 60102490083588

再 版 / 1999年6月

印 数 / 5000册

印 刷 / 天台县印刷厂

本书如有缺页、破损、装订错误，请寄回本处调换



一切佛经和佛学书籍，都能使人廓清迷惑，洞明宇宙人生的真理，趋吉避凶，自求多福；豁凡情而发圣解，超生死而生净土；乃至究竟解脱，圆成佛道。深有益于身心修养和家庭幸福。所以恭敬尊重，净手洁案地诚敬阅读，能得很大的利益。如或轻慢秽亵，损坏毁弃，则有很大的罪过。至希见者闻者，精研力行，保藏流传，翻印广布，功德无量。

净土五经重刊序

净土法门。其大无外。三根普被。利钝全收。九界众生。舍此则上无以圆成佛道。十方诸佛。离此则下无以普度群萌。一切法门。无不从此法界流。一切行门。无不还归此法界。若论大机所见。肇始实在华严。以善财遍参知识。末后於普贤座下。蒙其威神加被。所证者与普贤等。与诸佛等。是为等觉菩萨。普贤乃以十大愿王。劝进善财。及与华藏海众四十一位法身大士。回向往生西方极乐世界。以期圆满佛果。而为华严一经归宗结顶之法。然则华严明一生成佛之法。而归宗於求生净土。是知净土一法。乃十方三世一切诸佛。上成佛道。下化众生。成始成终之

无上大法也。此殆大机所见。二乘尚不见闻。况具缚凡夫乎。迨至方等会上。特为专说淨土三经。俾一切若凡若圣。同事修持。以期现生出此五浊。登彼九莲也。佛在摩竭提国。灵鹫山中。说阿弥陀佛最初因地。弃国出家。发四十八愿。又复久经长劫。依愿修行。迨至福慧圆满。得成佛道。所感之世界庄严。妙莫能名。十方诸佛咸赞叹。十方菩萨。与回小向大之二乘。具足惑业之凡夫。咸得往生。等蒙摄受。是为无量寿经。於摩竭提国王宫中。说淨业三福。十六妙观。俾一切众生。悉知是心作佛。是心是佛。诸佛正遍知海。从心想生。则是心作众生。是心是众生。众生烦恼业海。从心想生之义。便已彰明校著。果能深明此义。谁肯枉

受轮回。末明九品生因。以期各修上品。是为观无量寿佛经。在舍卫国。给孤园中。说净土依正妙果。令生信。劝诸闻者。应求往生。以发愿。复令行者。执持名号。以立行。信愿行三。为净土法门之纲宗。具此三法。或毕生执持。已得一心。或临终方闻。止称十念。均得蒙佛接引。往生西方。是为阿弥陀经。此三乃专谈净土之经。而阿弥陀经。摄机尤普。以故禅教律各宗。咸皆奉为日课焉。诸大乘经。带说净土者。多难胜数。而楞严经。大势至念佛圆通章。实为念佛最妙开示。众生果能都摄六根。净念相继。以念。岂有不现前当来必定见佛。近证圆通。远成佛道乎哉。故将此章。列於三经之后。而以普贤行愿品。殿之。以成净土法门之一。

大緣起。令諸閱者。知此一法。大暢佛懷。校彼仗自力。斷惑證真。以了生死者。其難易奚啻天淵懸殊。以故九界同歸。十方共贊。千經俱闡。萬論均宣也。金陵淨土四經板。已經模糊。修淨業者。苦无最清爽之讀本。因為鑄板。以勢至念佛圓通章。附於三經之後。稱為淨土五經。若論法門緣起。宜以无量壽經為首。今為便於讀誦。故以阿彌陀經為首。閱者諒之。

民國二十二年歲次癸酉夏歷元旦常慚愧僧釋印光謹撰

佛说阿弥陀经

姚秦三藏法师鸠摩罗什译

如是我闻。一时佛在舍卫国祇树给孤独园。与大比丘僧千二百五十人俱。皆是大阿罗汉。众所知识。长老舍利弗。摩诃目犍连。摩诃迦叶。摩诃迦旃延。摩诃俱絺罗。离婆多。周利盘陀伽。难陀。阿难陀。罗睺罗。侨梵波提。宾头卢。颇罗堕。迦留陀夷。摩诃劫宾那。薄拘罗。阿菟楼駄。如是等诸大弟子。并诸菩萨摩訶萨。文殊师利法王子。阿逸多菩萨。乾陀诃提菩萨。常精进菩萨。与如是等诸大菩萨。及释提桓因等。无量诸天大众俱。尔时佛告长老舍利弗。从是西方过十万亿佛土。有世界名曰极乐。其土有

佛號阿彌陀。今現在說法。舍利弗。彼土何故名為極樂。其國眾生。无有众苦。但受诸乐。故名極樂。又舍利弗。極樂國土。七重栏楯。七重羅網。七重行樹。皆是四寶周匝圍繞。是故彼國名為極樂。又舍利弗。極樂國土。有七寶池。八功德水。充滿其中。池底純以金沙布地。四邊階道。金銀瑠璃玻璃合成。上有樓閣。亦以金銀瑠璃玻璃。砗磲赤珠碼瑙而嚴飾之。池中蓮華。大如车轮。青色青光。黃色黃光。赤色赤光。白色白光。微妙香潔。舍利弗。極樂國土。成就如是功德莊嚴。又舍利弗。彼佛國土。常作天樂。黃金為地。晝夜六時。雨天曼陀羅華。其土眾生。常以清旦。各以衣祴盛眾妙華。供養他方十萬億佛。即以食時。還到本國。飯食經行。

舍利弗。极乐国土。成就如是功德庄严。复次舍利弗。彼国常有种种奇妙杂色之鸟。白鹤孔雀。鹦鹉。舍利。迦陵频伽。共命之鸟。是诸众鸟。昼夜六时。出和雅音。其音演畅五根。五力。七菩提分。八圣道分。如是等法。其土众生。闻是音已。皆悉念佛念法念僧。舍利弗。汝勿谓此鸟。实是罪报所生。所以者何。彼佛国土。无三恶道。舍利弗。其佛国土。尚无恶道之名。何况有实。是诸众鸟。皆是阿弥陀佛。欲令法音宣流。变化所作。舍利弗。彼佛国土。微风吹动诸宝行树。及宝罗网。出微妙音。譬如百千种乐。同时俱作。闻是音者。自然皆生念佛念法念僧之心。舍利弗。其佛国土。成就如是功德庄严。舍利弗。於汝意云何。彼佛何故号阿弥陀。舍

利弗。彼佛光明無量。照十方國。無所障礙。是故號為阿彌陀。又
 舍利弗。彼佛壽命。及其人民。無量無邊阿僧祇劫。故名阿彌陀。
 舍利弗。阿彌陀佛成佛已來。於今十劫。又舍利弗。彼佛有無量
 無邊聲聞弟子。皆阿羅漢。非是算數之所能知。諸菩薩眾。亦復
 如是。舍利弗。彼佛國土。成就如是功德莊嚴。又舍利弗。極樂國
 土。眾生生者。皆是阿鞞跋致。其中多有一生補處。其數甚多。非
 是算數所能知之。但可以無量無邊阿僧祇說。舍利弗。眾生聞
 者。应当發願。願生彼國。所以者何。得與如是諸上善人。俱會一
 處。舍利弗。不可以少善根福德因緣。得生彼國。舍利弗。若有善
 男子。善女人。聞說阿彌陀佛。執持名號。若一日。若二日。若三日。

若四日。若五日。若六日。若七日。一心不乱。其人临命终时。阿弥
陀佛。与诸圣众。现在其前。是人终时。心不颠倒。即得往生阿弥
陀佛极乐国土。舍利弗。我见是利。故说此言。若有众生。闻是说
者。应当发愿。生彼国土。舍利弗。如我今者。赞叹阿弥陀佛。不可
思议功德之利。东方亦有阿閼鞞佛。须弥相佛。大须弥佛。须弥
光佛。妙音佛。如是等恒河沙数诸佛。各於其国。出广长舌相。遍
覆三千大千世界。说诚实言。汝等众生。当信是称赞不可思议
功德。一切诸佛所护念经。舍利弗。南方世界。有日月灯佛。名闻
光佛。大焰肩佛。须弥灯佛。无量精进佛。如是等恒河沙数诸佛。
各於其国。出广长舌相。遍覆三千大千世界。说诚实言。汝等众

生。當信是稱贊不可思議功德。一切諸佛所護念經。舍利弗。西方世界。有無量壽佛。無量相佛。無量幢佛。大光佛。大明佛。寶相佛。淨光佛。如是等恒河沙數諸佛。各於其國。出廣長舌相。遍覆三千大千世界。說誠實言。汝等眾生。當信是稱贊不可思議功德。一切諸佛所護念經。舍利弗。北方世界。有焰肩佛。最勝音佛。難沮佛。日生佛。網明佛。如是等恒河沙數諸佛。各於其國。出廣長舌相。遍覆三千大千世界。說誠實言。汝等眾生。當信是稱贊不可思議功德。一切諸佛所護念經。舍利弗。下方世界。有師子佛。名聞佛。名光佛。達摩佛。法幢佛。持法佛。如是等恒河沙數諸佛。各於其國。出廣長舌相。遍覆三千大千世界。說誠實言。汝等

众生。当信是称赞不可思议功德。一切诸佛所护念经。舍利弗。上方世界。有梵音佛。宿王佛。香上佛。香光佛。大焰肩佛。杂色宝华严身佛。娑罗树王佛。宝华德佛。见一切义佛。如须弥山佛。如是等恒河沙数诸佛。各於其国。出广长舌相。遍覆三千大千世界。说诚实言。汝等众生。当信是称赞不可思议功德。一切诸佛所护念经。舍利弗。於汝意云何。何故名为一切诸佛所护念经。舍利弗。若有善男子。善女人。闻是经受持者。及闻诸佛名者。是诸善男子。善女人。皆为一切诸佛之所护念。皆得不退转於阿耨多罗三藐三菩提。是故舍利弗。汝等皆当信受我语。及诸佛所说。舍利弗。若有人。已发愿。今发愿。当发愿。欲生阿弥陀佛国。

者。是諸人等。皆得不退轉於阿耨多羅三藐三菩提。於彼國土。若已生。若今生。若當生。是故舍利弗。諸善男子。善女人。若有信者。應當發願。生彼國土。舍利弗。如我今者。稱贊諸佛。不可思議功德。彼諸佛等。亦稱贊我。不可思議功德。而作是言。釋迦牟尼佛。能為甚難希有之事。能於娑婆國土。五濁惡世。劫濁。見濁。煩惱濁。眾生濁。命濁中。得阿耨多羅三藐三菩提。為諸眾生。說是一切世間難信之法。舍利弗。當知我於五濁惡世。行此難事。得阿耨多羅三藐三菩提。為一切世間說此難信之法。是為甚難。佛說此經已。舍利弗。及諸比丘。一切世間天人阿修羅等。聞佛所說。歡喜信受。作禮而去。

佛说阿弥陀经

拔一切业障根本得生净土陀罗尼

南无阿弥多婆夜。哆他伽路夜。哆地夜他。阿弥唎都婆毗。阿弥唎哆。悉耽婆毗。阿弥唎哆。毗迦兰帝。阿弥唎哆。毗迦兰哆。伽弥膩。伽伽那。枳多迦隸。娑婆呵。

音释

绀

痴音

窻

切奴

候

驮

切唐

何

衣

祴

衣祴

前古

得

也

切

盛

受时

征

也

切

阿

鞞

跋

致

鞞梵

骈

语迷

也

此

跋

云不

退

转

阙

切昌

六

沮

切慈

吕